

章氏遺書

第二冊

章氏遺書卷第二十六

湖北通志檢存稿三

蕭山王宗炎編次

吳興劉承幹校訂

顧天錫傳

子景星

顧天錫字重光祖闕父大訓自有傳天錫生十歲從祖
闕山居讀書穎悟十五治尙書十八治春秋二十一治
禮督學華亭董其昌深鑒賞之萬厯癸丑闕卒衰經處
別寢者三年與太倉張溥金壇張明弼東鄉艾南英臨
川陳際泰羅萬藻章世純萬時華聲氣遙集倡爲古學
值遼東事變侘傺鬱悵脫略縱酒或以粉塗面走林莽
閒挽拍伶歌悲來泣下或束書泛舟孤往彌月忘歸癸

亥改國子生對策及庵寺主司大恐落其名監生曹某
請生祀魏忠賢於太學強以署名天錫投筆徑去客居
保定值莊烈帝卽位監生錢嘉徵袖疏密示曰急署名
上將誅奄此必得當天錫謝曰某鄉不徇曹君之非今
豈敢分君之是邪太僕米萬鍾館之海淀課其子弟過
永平登陽山置酒望東北雲氣如五色繪綵成龍虎文
天錫歎曰王者氣也酒酣長歌悲壯激越時太白經午
雨土故鄉地震釜底皆有篆文有鄉民四歲兒一夜變
番僧狀楓樹生花如蓮江上雷震一物魚身牛首青山
鄉民水甕汲滿立涸漩渦作聲城東李氏地中有聲如
牛天錫方轉徙天津河閒以詩禮教授弟子凡數百人

遠近稱顧夫子五試太學再登乙榜所指授爲制舉文學者多以售及門或登館局臺省而天錫卒不遇以積分詣部當除知縣不就詔徵辟特用人才不應丁丑出都漳浦黃道周歎曰劉向南矣遂由齊魯河淮作河淮江三策歸築嵩園盡出先世遺書教子景星菟釐攻辨無閒寒暑夜必聞雞深究漢劉向氏學用洪範五行皇極經世推明天人儆誠後世著戒史七十卷大旨以謂劉向用五事配五行說本夏侯氏與天文五星樂律之書貌屬水言屬火視屬木聽屬金思屬土劉氏從而衍之宋儒疑九疇本九則詆議劉氏並疑雒圖蓋劉意深特其說未盡合耳經一水二火三木四金五土一貌

二言三視四聽五思曰雨曰暘曰燠曰寒曰風何以言之升降俯仰血氣也胚胎血氣之本也故貌從水雨水也正月坎九五始雨水九月天根見雨止水始涸貌恭血氣和則休徵時雨不恭則狂狂則咎徵恒雨水失德汎濫淫佚故爲大水爲不潤下地忽變甘鹹或涌溢飛闔皆不潤下也潛伏爲介故爲介蟲之孽魚水族也故爲魚孽鼠水屬也性陰賊故爲鼠妖豕黑色善下故爲豕旤服制所以飭貌貌不恭故爲服妖支離淫亂故爲下體生上之病其應爲僭爲篡狂之罰也凡物不當上而上者皆是也水色墨故爲黑眚黑祥眚自內生祥繇外致也坎爲隱伏爲加憂故爲恒陰爲夜妖惟水沴木

沴金沴土凡我沴彼其咎在我不在彼也聲成言言成
文明離象也故言從火離爲日爲電故暘火德也言從
則休徵時暘不從則僭僭則咎徵恒暘雨少陰之氣金
德主順也僭則不順火來乘金是爲爍金故不雨也火
失其性則不炎上凡火光轉行火不熱烝爍不興燄火
嘯噴皆不炎上也天見隕火不爲不炎上何也天火炎
下地火炎上天火太陽也地火雲雷木石金水土之火
也故地見流火爲陰火爲不炎上天見殞火不爲不炎
上也不爲不炎上故但爲赤祥也飛陽就燥爲羽故爲
羽蟲之孽雞羽屬赤色爲正故爲雞旤蝗介而羽離象
陰驕陽亢是生蝗孽亦爲火沴水馬火屬也火氣逸故

爲馬旤火藏發竅於口舌故爲口舌之疴爲詩妖爲訛
言熒惑爲妖則謠讖興也離爲乾爲大腹爲擊爲烈故
爲鼓妖凡物不當聲而聲皆曰鼓妖也火色赤故爲赤
祥惟火沴水沴木沴金沴土東方震震來虩虩故視屬
木木藏發竅於目故爲目疴於時爲春燠則蟄蟲啟草
木茂視明則休徵時燠不明則豫瞽者之行猶豫也豫
則咎徵恒燠凡無冰無雪霜不殺草冬溫桃李冬華冬
不電而雷冬春雹春無雷春不風雨春秋大熱秋暑復
榮愆陽亂生皆恒燠也亦木沴水少陽之氣所泄也爲
木不曲直連理倒生易種皆不曲直也爲草妖木類也
曲直爲龍蛇故爲龍蛇之孽艮爲狗艮東北方少陽之

位素問曰春木令其畜狗狗蒼色爲正故爲狗旤木色青故爲青眚青祥惟木沴水沴火沴金沴土金主聲聲主聽聽主耳耳屬水金水清寒則耳中空空則聰聰則休徵時寒不聰厥咎急如聾者褊急自信也急則咎徵恒寒金主殺伐殺伐過肅故恒寒也爲金不從革金自成毀不聽陶冶也爲耳病耳聽官也西方兌兌爲羊故爲羊旤羊白色爲正也金通氣爲毫毛故爲毛蟲之孽爲虎妖金色白故爲白眚白祥惟金沴水沴火沴木沴土五行宅中爲土五藏宅中爲心心之官則思思睿則休徵時風風土氣之發思之象也不睿則蒙蒙則咎徵恒風甚則霾霧矣爲不稼穡不稼穡者不旱潦而百穀

草木不實也凡石麴聖米野麥穠穀稗草化稻稻化稗
草野蠶成蠶地中得米穀皆不稼也爲雨土不風不霧
而塤塤埤埤然而著於物也爲虹蜺土氣淫泄陰陽亂
合也爲瘟疫火土交厲也爲人疴萬物惟人善思其爲
疴也爲民多癡多狂悖多暴厥死復生生異形男化女
女化男男女具體童子暴長是也爲羸蟲之孽螟類也
爲孽男女媾精草木媾榮國有女譌華妖乃生爲心腹
之疴爲果蓏之孽果蓏仁蕙象人心也爲牛旤牛大心
而少慮者也土色黃故爲黃眚黃祥惟土沴木沴水沴
火沴金土宅中而寄王失德則眾沴歸之故惟水火金
木沴土災之大至焉矣王者有震德則不爲災周易曰

震無咎者存乎悔因衍五行交沴爲二十五類列以爲圖一六曰水爲貌爲後宮爲庶謀爲禮官二七曰火爲言爲外戚爲庶官爲吏官三八曰木爲視爲相爲庶民爲工官四九曰金爲聽爲將爲兵刑官五十曰土爲思爲君爲庶事爲戶官擴劉氏說而詳焉崇禎己卯明太祖孝陵蝦蟆石樹災五月家園古樟災筮之得旅之小過曰異哉是爲鳥焚其巢飛鳥離之凶與漢河平元年戴災其巢占同先是乙亥流賊初渡河知州築關城名曰符乾天錫曰嘻其轉言爲乾符王仙芝陷淮南之年也蘄淮南地也癸未之變賊由符乾關入遂屠蘄城天錫爲世子遺左良玉書良玉得書泣歛軍還屯武昌天

錫辭世子南下歸祖籍崑山祖居甲申順治元年故明福王監國南京改元宏光術者言光者盡也天錫曰異哉是爲言不從昔漢元帝建元竟寧時以爲終極曹不禪位闕澤以爲不十齊天保爲大人只十隋廣運爲軍走大業爲苦末元至正爲一止言之不從應亦隨之又言本朝前後禮臣不學年號有可異者前涼張重華五代張遇賢宋賊方臘皆號永樂夏王李乾順號正德西魏孝武號泰昌五代史契丹兀欲號天順皇帝金大安三年山東賊楊安兒元泰定帝子阿速吉八皆號天順齊立後梁永嘉王莊爲梁帝改元天啟唐僞溥世隆號天啟何其沓歟因著改元考分正統僭僞盜賊外域凡

八卷乙酉南京禮部失印天錫曰嗚乎天戒若日無用
禮也禮失喪無日矣筮之殫思終日因爲讜騷二章述
寇亂慨當時一章曰五珍始今災殫震牛首兮江干著
雍單闕兮人痾四齡暴長兮更皤肅殺窳兮亥氣弇戾
土坎兮木先慙奧亢兮隆蟲膈股兮土童江汜兮蜚鴻
旣旣悉兮時運極神靈怒兮鬼夜泣雷填填兮雪霰集
長矢抨兮短兵接崇墉墮兮震轟葩匪夜明兮天緞帶
軋轢兮追泐屍覆兮矛搜負嬰烈兮異類服亟艤渡兮
湖之屋遺黎何臯兮名洗巢元顏烝敵兮江之臯曼江
澣兮迢遙頤白厓兮干雕霏霧兮次瘳藹藹兮自穀聊音
卷局芳蕤兮辨猗難牛何切悲風第兮可奈何進屯屯兮

退漫漫岫森連蹇兮難以久延蜩蟬羹沸兮筆播譽

右述

寇亂二章曰郵傳兮遲遲仄望兮眈眈年遽逝兮世不治

全躬浴德兮忠孝維倬嗇身名後兮道有固然策策爲

愁兮謇謇爲賢促偃蹇以偃卽兮弔櫬槍之指茲愍世

莫予知兮爰譏喻於亂詞亂曰嫫歆后育兮奠八百之

丕基礪崩厓溺兮何革命之斯須赤烏腌夫駿烏兮五

馬餓於一龍占厥運於闕逢兮慮二儀之旃蒙謝鵬夷

於東門兮汨乎吾將曷從

右慨當時

留江南八年挈子景星

歸蘄結茅爲廬年饑嚼柏葉飲水歷數月不病環堵無

門石爲几榻甑腕著書十年石稜盡滅撰書具於後序

天錫少孤鞠養於姊

卽劉鉞妻自有傳

事姊如嚴父焉姊卒赴

聞自投牀下以爪撻面流血沾衣祖父母父母姊忌辰
長跽移日至老不衰天錫抗爽好罵然不暴人短不發
人私隱有族父無嗣分遺百緡罵曰吾豈以父無嗣爲
利哉卽取以周貧族有族子貧自鬻身罵之質衣贖歸
而分之田出都有友寄金帛數千段密託他所歲餘還
都或告曰某怨君天錫罵之及指物往取封識如故康
熙癸卯卒年七十五子景星

景星字赤方一字黃公生時父夢星降於庭形如半月
因名景星三歲不語一日忽語稱彌月及前生事甚悉
五歲值葬大父哭踊如成人歲饑荆王命有司元夕張
燈象人衣以彩襦俾往觀卽蹙然曰何不以此賑飢遂

不往六歲能賦詩八九歲徧讀經史目數行下時稱聖
童有詩文一囊束髮就府試合肥龔鼎孳爲蘄水縣一
見卽曰江夏黃童天下無雙薦於知府試風簷下立草
十數藝日未昃也知府驚異與論古今歎曰此王佐才
也拔冠屬第一督學試亦第一己卯鄉試中副榜旋丁
母憂時饑疫相仍寇氛四熾張獻忠等蟠結旁邑日伺
蘄城先是總督熊文燦挈獻忠等十餘營降賊過蘄荆
王止賊首飲令走馬後宮與寵姬同觀景星年方十六
急謁知州曰熊公不得死所矣獻忠於諸賊最黠不早
除之必貽後患奈何旣不爲備反令此輩得窺王宮知
州色變勒技勇入衛周旋竟日而罷明年獻忠果叛癸

未屠蘄戮王棺虜其寵姬天錫父子避亂崑山依族氏
居甲申鼎革福王監國南京試七省流寓生貢御史陳
良弼舉景星第一武英殿廷試特授推官隨上疏敬陳
四事一曰車駕宜駐淮以張國勢陛下承運卽位南都
海內仰戴爲神人主然以先帝臨之則陛下臣也三月
之變書契以來所未有臣子義不共天聞內外義師合
起已破賊關中爲先帝復讐而江南不聞出一旅加一
矢將來何辭以對義師乎況今死賊遊魂苟存旦夕非
如前日豬突狼戾不可制也其逸入楚境者鵠面裹創
掠野剽食不過寧南侯偏裨力可盡勦臣竊謂陛下宜
駐蹕於淮大集將吏蒐乘補卒聲言討賊而實不動降

良玉璽書懸厚賞使大江之中羽節相望牛酒日至獻
馘執俘內鼓軍愾外借聲援用兵大計無逾此者豈可
坐失機會以阻海內忠義之心夫人情孰不惡勞喜逸
然堅於圖功勇於改過故棄庸眾之情而後可成非常
之功昔晉公子重耳出亡過齊桓公妻以宗女有馬二
十乘公子安之無返國意趙衰咎犯乃醉公子而載以
行漢高入咸陽封秦苑囿府庫還軍灞上故重耳卒伯
諸侯而漢高奄有天下陛下自五月卽位以來安居宮
禁將謂萬乘至尊不宜輕動而長江天塹恃以無慮乎
臣前於七月初十日仰見禮部恭上武英殿御座見時
天氣晴朗忽有黑雲自西北來焱風堀堞霹靂擊碎大